

✓
11-548



REIOVYSSANCE
DE LA FRANCE,
SVR
L'HEVRE V X
MARIAGE DV ROY ET
L'INFANTE D'ESPAGNE.



Toute la copie imprimée
A PARIS,
Chez Iean Brunet au bout du Pont
nostre Dame.

M. DC. XV.


Avec permission.

Case
F

39

326

1615



*Resiouyſſance de la France ſur l'heureux
Mariage du Roy & l'Infante
d'Eſpagne.*

A Pres que la France s'eſt d'elle-
meſme pacifiée par le moyen de
l'accompliſſement du deſſein du fils
aiſné de ce grand Roy, pour lequel
nos yeux jettent encores vne ſource
de pleurs, & que les vents & orages
cedent à ceſte heureuſe Alliance. Il
eſt temps que l'effort de nos bonnes
volontez paroiſſent, terraiſſant ceux
qui ont formé empelchement à cet
heureux ſubiect. Que diſ-je l'heure
eſt venuë que le ſon de la Trompette
doit reſonner pour nos felicitez, non
pas entonner les meurtres & les gués
à pens que nous apportent la guerre.
Ouy, le temps eſt arriué que les armes
doiuent eſtre poſees pour le carnage,
& releuees pour le triomphe de ce

fils aîné de Mars. Cesse tes pleurs, ô
 France, parce que par le moyen de
 l'union que font les Princes enuers le
 Roy, tu ne trouueras que roses, qu'
 œillets & fleurs odoriferantes, au lieu
 des espines & ronces que discorde
 auoit fait couler entr'eux. Resiouys
 toy France de ce que le Ciel t'a tant
 fauorisee que de rendre calme tes
 subiects aux effects malheureux que
 nous denonçoit la guerre.

Resiouissez vous François, & don-
 nez quelque trefue à vos larmes & à
 vos plaintes. J'ay tousiours estimé
 que vostre apprehension seroit plus
 grande que vostre mal. Il n'y peut
 auoir de contrarietez entre le Soleil
 & les Astres ausquels il cōmunique
 sa lumiere, ny de mauuaise intelligē-
 ce entre le Roy & messieurs les Prin-
 ces, lesquels tiennent leur honneur,

leur qualité & leurs biens à foy & à
hommage de sa Maieſté. L'autorité
Royale eſt trop bien imprimée en la
fideliſté des François, pour faire aucune
choſe preiudiciable à ſon ſervice & à
leur obeiſſance : la patrie eſt en telle
recommandation aux gens de bien
qu'ils en cherchèt pluſtoſt la conſer-
vation qu'ils n'en procurent la perte.
Themistoſcle quelque iuſte ſubiect
qu'il euſt de ſe venger des Atheniëſ,
qui luy auoiët donné des meſconten-
tements, pour les recompëſes de ſes
ſervices, & de recognoiſtre les fa-
ueurs & le bon traitement qu'il auoit
receu de Xerxe, tel à la verité qu'il
confefſoit luy-meſme, qu'il euſt eſté
perdu, aima mieux ſe dōner la mort,
que d'agrādir le Sceptre de Perſe à la
ruine de la Grece ſa chere patrie. En-
tre les animaux plus veneneux, il n'y

en a point qui fasse mourir sa mere
 que la Vipere, tous les autres jettent
 leur venin sur les ennemis de leur re-
 pos. Quelle apparence donc y auroit-
 il que les Princes ne pour la prote-
 ctio & pour la deffence de la Frãce,
 en desirassent la perte? ouurissent les
 entrailles qui les nourrissent, & arra-
 chassent les mammelles qui les allai-
 tent? Les enfans quelques fois se re-
 tirēt de leur mere, & se jettēt entre
 les bras de leur nourrice, & apres q̃
 leur iugemēt croist avec leur aage, se
 dedisāt de leur premiere inclinatio,
 & ne voulāt plus faire de traits d'en-
 fance, preferēt celle qui les a mis au
 mōde à celle de laquelle ils ont succē
 le laict. Mais ces genereux Princes
 sont assez iudicieux pour recognoi-
 stre q̃ la Frãce leur est mere & nour-
 rice, & qu'ils ne se peuent retirer

del'vne qu'ils ne s'esloignét de l'autre. Tout ainsi que le Ciel menace de la foudre le Laurier aussi bien que le Cedre, & neantmoins il ne le fait esclater que bien loin de luy. Je cròy que toutes ces troupes preparees és limites de la Frãce iront faire retétir leurs armes au milieu des mescreás, pour anter des nouveaux Lauriers sur les palmes de leurs ancestres.

Il est vray que M^oseigneur le Prince est cest Hercule fatal, qui doit aider à porter les charges de la Frãce. Sa presence y est requise, ou il n'aura pas moins d'hóneur en la conseruât par sa prudence, qu'il en pourroit acquerir ailleurs par les effects de son courage. C'est le pilote qui doit tenir le gouuernail de la barque, afin de la faire surgir au port de salut: alors la prospérité de la France fera prendre

garde aux merueilles de sa naissance, s'estonnant de voir tant de valeur accompagner sa jeunesse, & tant de bonnes fortunes succeder de sa prudence qu'il ne restera plus rien en l'accomplissement & en la perfection de l'une & de l'autre, que de les continuer & de le reseruer au bien du Royaume. C'est à ce coup que toutes les sinistres impressions qu'on auoit de son absence seront effacees, faisant lire en ses actions que le seruice du Roy après celuy de Dieu, est le but principal de toutes ses pensees & de toutes ses intentions. Ainsi le peuple qui ressentira les fruits de ses conseils entrera en admiration de ses vertus particulieres, lesquelles luy acquerront plus de villes & de prouinces, que ses armes ne luy en pourront soubmettre par force.

On dit souuent que les premieres impressions sont de si grande importance, qu'il est necessaire de bien commencer sa prise en la possession d'une charge, non pas seulement par des actions irreprehensibles, mais qui soient infiniemēt loüables, qu'il faut que l'entrée en soit belle si l'on veut que l'issuë en soit heureuse. Nous sommes en vne saison ou les peuples sont assez enclins d'eux-mesmes à reprendre les Grands & les Prouinces à se plaindre de ceux qui les gouuerment. Voila pourquoy il ne leur faut point donner de iuste subiect, de reprehension ny de plainte.

Monsieur de Neuers, qui à bon droit a de l'estime & de la renommée tant pour auoir esté chercher des perils hors de la France, que pour auoir tousiours eu le seruice du Roy en re-

commádation , s'era bien aise de faire
 reüssir les prouesses de ses armes sur
 les infidelles , tant pource que son
 ame genereuse ne peut arrester dans
 le calme , que pour se venger de la
 blesseure qu'il y receut , hazardant sa
 personne & sa vie en soldat auãturier,
 & non pas en Prince cõsiderant. Aussi
 les exercices de Mars sont ses plus
 chers esbatemens , se resouuenãt que
 c'est receuoir vn heureux dõmage
 que de perdre vn peu de plaisir inuti-
 le , pour acquerir de l'honneur, de la
 reputation & de l'authorité à la teste
 d'vne armée , veu que les Gouverne-
 mens, les Principautez, voire meisme
 les Royautez de qui les tiltres sont
 specieux & magnifiques , & dont le
 pouuoir semble si absolu, ne sont en
 effect que belles seruitudes & far-
 deaux, autãt onereux qu'honorables.

& desquels si on se vouloit acquitter dignement, ceux qui les possèdent n'auroient pas vne seule heure pour disner à leur plaisir.

Monsieur de Longueville y pourra semer les premiers fructs de la proüesse, afin d'en moissonner à loisir les recompenses, & de faire renaistre en sa jeunesse les valeurs & la recommandation de son pere.

Monsieur de Mayenne heritant du zele & de la bonne fortune de ses ayeuls, y pourra contribuer ses forces, & celle de ses amis, tant pour recueillir les fructs que ses predecesseurs y ont semez, que pour mettre en effect les conseils & les dernieres paroles de feu son pere, qui l'obligent à la deffence de la Foy Catholique, & au seruice de son Roy, sous le seau de sa benediction.

Monsieur de Vendosme y pourra
tesmoigner qu'il est fils naturel de ce
Grãd HENRY, & que les victoires fa-
milières à ce Monarque sôt les fleaux
des Barbares, & l'heur de sa posterité.

Toute ceste Noblesse Frãçoise qui
tranche les ailles à la victoire, pour
l'empescher de voler plus loin que le
bout de leurs espees, les suiuront à
cette honorable entreprise, remet tât
la peur & l'effroy entre ces Mahome-
tans, en sorte que ce sera assez pour
les vaincre de dire que ce sont des
Frãçois qui les cõbattent. C'est là où
cette Noblesse recommandable doit
estre opiniastre, & donner preuve de
la generosité de son courage, prennât
garde aux perfections particulieres
des Princes qui leur commanderont.
Et vous Messieurs les Princes, c'est
où vous deuez tascher que vos actiõs

respondent à l'estime que l'on a de
vostre prudence & de vostre valeur,
afin de ne perdre facilement la créace
qu'elle a de vostre reputatió, ne trou-
uant en vous toutes les perfectiones
qu'elle se feroit imaginée.

Mais laissons les affaires d'Estat à
ceux qui sont esleuez dans le com-
merce, & souuenons-nous seulement
que la France est en la tutelle de son
bon Ange: que le Roy est le Soleil
qui en dissipe les nuages, & qu'elle est
obligee à la prudence & vigilance de
la Roine, qui tenant les maximes de
ceste vertueuse Princesse Bláche me-
re du Roy S. Louys, veut achepter le
repos des suiects du Roy só Seigneur
& Fils, scachant bien que les guerres
intestines & ciuiles destruisent les
Monarchies, ne se pouuás entretenir
que par la desolation du peuple.

Elle a fuiuy le conseil des Princes & Officiers de la couronne, qui aiment mieux donner preuue de leur integrité & de leur fidelle obeyssance en la tranquillité du Royaume, que de se signaller & d'acquérir des triumphes à la perte du public, & au desaduantage des subiects du Roy. Le chef de la Iustice, Messieurs du Conseil, les Senateurs des celebres Parlemens de France, le Iuge de la Police, & tous les autres Officiers de sa Maiesté y contribuent leurs aduis salutaires & vtilés à la prosperité de ceste Couronne. Bref, le peuple mesme a importuné le Ciel de ses prieres, afin de le regarder en pitie, & de ne faire tóber ses fleaux sur luy: car tout ainsi qu'il fait ouyr son tonnerre par tout le monde, & ne le fait tomber qu'en vn lieu: de mesme il menace tous

ceux qui luy sont desobeyssans, & n'en chastie que quelques vns.

Sus donc François, faiçtes des feux de joye, afin que la paix que le Roy Henry le Grand vous auoit acquise par sa valeur, & cōtinuee par sa bōté, demeure entiere, inuiolable, & en la mesme splendeur qu'il nous l'auoit laissée: aussi auons nous trop d'obligation au pere pour nous dispenser de seruir le fils. Quand on trouue bon le fruit d'un arbre on conserue soigneusement les greffes & les rejettons, sous esperance qu'ils produiront vn mesme fruit ou pour nous, ou pour les nostres. Nous auōs resenty tant de bienfaits du feu Roy, que Dieu absolue, que sa memoire nous doit estre recommandable, & deuōs auoir l'œil à la prosperité du Roy son fils nostre Prince legitime, qui nous

est donné de Dieu pour nous seruir
 d'asile, & pour heriter des vertus &
 des possessions paternelles, avec vne
 fidelle assurance que nous en aurons
 les mesmes aduantages, & les mes-
 mes liberalitez que nous auons eues
 de feu sa Majesté son pere, ou pour
 nostre posterité. Prions Dieu qu'il
 luy plaise de nous le conseruer pour
 nous faire jouyr des fruiets de sa
 grandeur, & des promesses de sa
 naissance.

FIN.

4548

